



(Sarajevo, 18.12.2015. godine) – Jučer je u organizaciji Službe za zapošljavanje Kantona Sarajevo na Sarajevo Holiday Marketu održan Sajam zapošljavanja na kojem je učestvovalo 40 poslodavaca koji su iskazali interes za novim zapošljavanjem.

U okviru Sajma održan je i okrugli stol o temi: „Usklađivanje obrazovanja sa potrebama tržišta rada“ koji je okupio najbitnije partnere iz oblasti zapošljavanja, obrazovanja, privrede i nevladinog sektora.

Direktor Federalnog zavoda za zapošljavanje Omer Korjenić istakao je tom prilikom da je u narednom periodu potrebno prilagoditi obrazovne politike potrebama privrede, te da bi bilo korisno poticati poduzetništvo kroz obrazovne programe.

Prema njegovim riječima posljednji statistički pokazatelji o kretanjima na tržištu rada ukazuju na pozitivne trendove - raste broj zaposlenih, a broj nezaposlenih je u opadajućem trendu. Očekuje se da će se takav trend nastaviti iduće godine, a doprinos tome svakako trebaju dati i službe za zapošljavanje kroz mjere aktivne politike zapošljavanja.

"Naredne godine planirana je, između ostalog, podrška samozapošljavanju, dakle osobama koje imaju namjeru pokrenuti vlastiti biznis. Daljnja podrška će se ogledati kroz poticaje zapošljavanja u privatnom sektoru putem zapošljavanja mladih osoba bez radnog iskustva, ali onih koji su duže vrijeme bez posla, teško zapošljive kategorije. Poseban program će biti obuka i finansiranje stručnog osposobljavanja i usavršavanja nezaposlenih osoba u skladu sa potrebama tržišta rada", kazao je Korjenić.

"Ono što bi trebalo učiniti u narednom periodu jeste prilagoditi obrazovne politike potrebama privrede. Često se dešava da poslodavci iskazuju nezadovoljstvo sa stečnim znanjima i vještinama onih koji su završili određeni stepen školovanja i već postaje, iz godine u godinu, jasno da je problem u nedostatku praktičnih znanja i vještina", dodao je Korjenić. Kako bi preduprijedili ovakav trend, naglasio je, potrebno je uvezati obrazovne institucije sa poslovnom zajednicom.

Rukovodilac Sektora za posredovanje u zapošljavanju Službe za zapošljavanje Kantona Sarajevo Mahir Lokvančić govorio je o statističkim pokazateljima i provedenom istraživanju tržišta rada. Prema njegovim riječima, statistički pokazatelji govore da su poslodavci u prošloj godini najviše potraživali diplomirane ekonomiste, smjer revizija i računovodstvo. Traženi su prodavači bez obzira što ih ima mnogo na evidencijama, ali oni često ne mogu da zadovolje potrebe poslodavaca, pa su potrebne dodatne edukacije, obuke i dokvalifikacije kako bi odgovorili potrebama poslodavaca.

"Formalno obrazovanje više nije dovoljno, jer živimo u društvu znanja gdje tehnika i tehnologija svakodnevno napreduju, tako da su zaposlenima i nezaposlenima potrebna dodatna znanja i vještine", kazao je Lokvančić.

Projekt-menadžerica u Centru za specijalističke edukacije Format Narcisa Bašić Gaković je govorila o deficitarnim kadrovima i potrebama koje se javljaju na tržištu rada, konkretno kada je riječ o drvnoj industriji.

„Kada je riječ o srednjoj stručnoj spremi, u sektoru drvne industrije traženi su stolar pločastog namještaja i masiva, tapetar, lakirer, zatim CNC operater i programer", kaže Bašić-Gaković.